



東華續錄

光緒六十二

臣朱壽朋敬編

臣張毓英恭校

六月癸酉朔諭軍機大臣等疊據何璟張佩綸等電報法全力注閩已進八艘請飭援應牽制等語孤拔赴閩有欲踞地爲質之說南北洋覆稱無船可撥惟閩防緊急粵浙相距較近著彭玉麟張樹聲張之洞倪文蔚劉秉璋酌撥師船前往設法援應牽制○戶部奏光緒十年四月二十五日奉上諭詹事府代遞左中允崔國因奏度支日絀請實事求是力挽積習一摺所陳各條不爲無見著戶部核議具奏欽此欽遵由內閣鈔出到部查原奏所陳八條一曰敦節儉臣等伏維我朝列祖列宗儉德相承二百餘載我皇太后皇上仰體列聖詒謀躬行節儉光緒四年二月奉懿旨裁減宮闈用欸節省浮

費以爲晉豫賑需九年八月奉懿旨將中秋節應進欸項五萬兩撥抵順直賑需儉德昭垂中外共仰方今庫欸支絀國用未充尤當崇尚樸實力戒奢華欲清其源自貴者始相應請旨通飭內外大小臣工屏除浮靡共挽頽風富者圖置於豐貧者量入爲出庶幾家給人足民生厚而風俗純矣一曰講農政查原奏所稱專指墾荒一節臣等查光緒四年四月御史彭世昌條陳備荒摺內重農事勤開墾兩條當

經奉 旨頒發各省妥籌辦理五年十月 臣部議覆侍讀王先謙條陳墾荒摺內請 旨飭下各省督撫限三箇月將荒熟田地開單奏咨報部並安定勸懲章程奉 旨允准通行各省六年正月 臣部奏籌餉十條摺內第一條嚴催各省墾荒並令將如何辦理開墾之處專案奏咨報部當經奉 旨令各督撫振刷精神悉心經畫等因各在案是墾荒一事 臣部迭次所議實已詳細嚴明而奉行仍在州縣督催仍在上司歷年來各省尚未一律舉辦以致地畝尚未復額應再請 旨嚴飭各督撫查照 臣部迭次議奏各案認真率屬竭力整頓悉復舊額足國裕民之本不外是矣一曰重倉儲 臣等查同治三年奉 上諭嗣後各省常平社倉責成各督撫大吏認真整頓廢者復之缺者補之並通行各督撫查明據實覆奏等因欽此六年十月奉 上諭給事中夏獻馨奏設立義倉一摺著各督撫申明舊例酌議章程廣設義倉實力奉行等因欽此光緒二年八月奉 上諭鮑源深奏請飭各省捐備倉穀以濟荒歉仿照江南豐備倉之法勸民遵辦地方官不問其出入以杜擾累著各督撫體察情形飭屬辦理等因欽此四年二月奉 上諭給事中崔穆之奏整頓各省倉穀一摺著各督撫飭屬將倉穀陸續買補務期足額勸諭紳民次第興舉如能著有成效並准其奏請獎勵等因欽此四年四月御史彭世昌條陳備荒摺內裕倉儲一條法良意美便於施行當經奉 旨頒發各省妥籌辦理五年七月奉 上諭御史鄔純嘏奏積穀備荒一摺

著各督撫仿照常平社倉之意飭令民捐民辦不准更胥經手以杜擾累等因欽此五年十二月奉 上諭御史章乃倉奏請飭舉行社學一摺著各督撫轉飭州縣一律興修或藉資民力或酌提公項著察度情形奏明辦理等因欽此是倉儲一事亦不啻三令五申現在惟山東舉行積穀數十萬石各省尙未一律奏報應再請 旨通飭各督撫恪遵歷年 諭旨認真率屬實力奉行儲積於平時庶荒年可以無患

矣一曰修鹽政

臣

等查上年十月議覆御史桂霖妥籌良法摺內

臣

部將各省鹽務凡奏咨有案者分別

逐一查詢其未經報部或有流弊之處令各督撫實力整頓認真裁除附片具奏奉

旨依議欽此此外

如堵緝私烏減輕成本革除陋規裁減浮費嚴定考成招商認辦懸岸依限造報奏銷各節近年來歷經

臣部奏請奉

旨飭辦者亦不啻三令五申與該中允所奏大略相同應再請

旨飭令管理鹽政各督

撫嚴飭運司鹽道及鹽務各員查照

臣

部歷次所陳極力請求搜除積弊總期恤商裕課因地制宜庶幾

力振頽綱鹽務日有起色矣一曰查關稅

臣

等伏查關稅一項正額盈餘均有定額同治五年九月奉

上諭蔣益澧奏查明太平關稅務積弊一摺著由該撫派委廉能之員幫同關道管理此外各省關務均

著該管督撫監督等實心清釐等因欽此光緒五年二月

臣

部議覆御史黃元善請將關稅盈餘歸公摺

內請 旨飭下各省關嗣後務宜實力稽徵按年徵足原額此外再有多餘儘收儘解六年正月

臣部奏

籌備餉需一摺第三條內通核關稅銀兩行令各省關除徵解足額外仍令就徵收實在情形按年量力
溢解共濟時艱各等因均經奏奉 諭旨欽遵行知在案至釐金一項雖非正供而自軍興以後除丁漕
鹽關外實以此爲大宗經臣部於光緒二年十一月奏綜核度支整頓財用及六年正月奏籌備餉需各
摺內行令各省督撫設法整頓力杜中飽今年三月二十六日奉 上諭各省抽收釐金迭經諭令該督
撫等據實報部力杜中飽乃近來釐局委員往往徇情濫委任用非人以致貪婪侵蝕百弊叢生殊堪痛
恨當此庫欸支絀之時自應涓滴歸公實徵實解若非認真稽察將使億萬釐金半歸私橐實屬不成事
體嗣後該督撫等務當激發天良明查暗訪設法整頓尤以責任委員爲第一要義並將各該省釐局徵
收數目隨時稽核嚴杜弊端該委員等如有侵漁及擾累情事立即嚴參懲辦倘敢瞻徇情面袒護屬員
或被入參奏或別經發覺定將該督撫等嚴懲決不寬貸將此通諭知之欽此欽遵行知在案是關稅釐
金尤爲近來要務利之所在弊不勝防應請 旨飭下各省關督撫監督等懷遵前奉 諭旨實力辦理
務期涓滴歸公日有起色以重庫欸而裕餉源至原奏內稱出口稅重進口稅輕一節經臣部行查總理
各國事務衙門據稱查條約內載新定稅則並通商各欸目日後兩國彼此欲再重修以十年爲限期滿
須於六箇月之前先行知照酌量更改若彼此未經先期聲明則稅課仍照前章完納復俟十年再行更

改又載進出口各稅均以價值爲率每價百兩徵稅五兩旋因各貨價減以致原定公平稅則較重擬將舊則重訂嗣於善後條約訂明進出口稅則倘有貨物名目稅則未載又不在免稅之例者仍照值百抽五之例徵稅等因均經奉 旨准行在案各外國徵收他國進口之貨稅多寡不等有值百抽至五六十者中國收各外國進口之貨稅一律值百抽五當時中國不知外國情形實屬喫虧太甚但現在欲與更改稅則須俟各國修約年分始能辦理等語是進出口稅應俟復修條約時由總理衙門酌量情形奏明辦理現在應毋庸議一曰重庫欸查原奏所引雍正年間查出虧欠庫欸各案皆屬相符惟所稱光緒八年五月禮親王等盤查戶部銀庫數目不符一節臣等查八年五月禮親王等盤查銀庫虧短銀七百五十兩係指內庫而言當經奏明奉 旨著落賠補有案可稽並非戶部銀庫虧短該中允所言想係傳聞之誤惟查庫欸關繫重大理宜慎守職司應請 旨通飭各省督撫將軍監督司道府州縣等凡有庫儲之責者皆當躬核簿書分晰欸項慎考出入嚴稽屬庫毋憚厭煩屑毋概任幕吏毋自謀營私毋瞻徇情面交代必清虧缺卽參庶不致積累愈深賠補愈難矣一曰禁侵吞查原奏所引雍正年間查出侵吞各案及近年張之洞查出冒銷穀價等案皆屬相符各省錢糧正供及關卡課稅蠹吏侵吞入己例禁本極嚴明無如舉發者少總由各省大吏未能破除情面實力稽查應請 旨通飭各省督撫認真訪察據實

參辦毋忽於既往毋徇庇屬員斯貪吏奸胥知所儆懼積弊可稍除矣一日懲虧空查原奏內稱浙江巡撫劉秉璋奏浙省州縣徵收錢糧一節臣等查州縣虧短倉庫錢糧大千例禁近來視爲具文本年劉秉璋奏杜絕州縣隱匿錢糧明定章程一摺立法極爲確當臣等現擬就該撫所奏再爲嚴定處分實核例限並將該撫所擬章程六條通行各省仿照遵辦應由臣等另行專摺詳細具奏請 旨遵行抑臣等更有請者今時之急務貴生財尤貴理財財之大端有治人乃有治法以上八條內外臣工迭次條奏臣部迭次籌議加以歷年 諭旨誥誡嚴明至於再四而積弊猶未盡除財源猶未充裕者皆由委員屬吏不得其人敷衍因循積重難返之故耳蓋 朝廷以鉅任責之大吏大吏以庶務委之屬僚如果任用皆得其人縱不必屢頒 諭旨屢煩奏章亦自能仰體 聖心因時整頓若任聽不肖屬僚欺飾朦朧壅荒積弊則視爲可緩之圖鹽務關稅釐金則視爲舊有之弊虧空侵吞庫欸則相率隱匿不肯舉發糾參是雖臣部屢奏定章 朝廷屢降 嚴旨亦不過虛文故事弊何以去利何以興相應請 旨嚴飭各省督撫將軍司道監督等嗣後一切委任務當慎選廉明公正之員認真辦理庶幾人存政舉不致徒託空言矣得 旨如所議行○甲戌諭軍機大臣等法艦至基隆購煉劉銘傳飭封煤窰所辦甚是著傳旨嘉獎礮臺俱在低處著卽趕緊改築礮位是否合用尤關緊要法情巨測務當布置周密勿稍大意斷絕接濟

是制敵要策各海口均當仿照辦理著卽諭令沿海各統兵大員知悉○諭前據御史屠仁守奏湖北鄖西縣廩生余瓊芳身死一案疑竇多端顯有冤抑當派卞寶第詳加檢驗悉心覆鞫旋經卞寶第奏稱調到江西仵作檢驗屍骨與原驗不符請另派仵作覆驗復據屠仁守奏督臣瞻徇迴護請另派大員查辦當派侍郎孫毓汶烏拉布馳赴該省查辦嗣據該侍郎等先後奏陳檢驗有傷並搜獲串供信函多件及現訊情形迭經諭令詳細推求訊取確供以成信讞茲據該侍郎等審明定擬具奏此案鄖西縣書吏干瑞堂因余瓊芳在捐局查問欠帳不服口角余瓊芳向前毆打干瑞堂將其推跌至地用拳連毆並踢傷左後脇殞命檢驗屍骨應傷相符該犯供認不諱衆供亦均確鑿干瑞堂著照所擬絞監候歸入下屆秋審辦理書吏王士俊於干瑞堂毆打余瓊芳輒用拳幫毆著照所擬革去書吏杖一百千必達代作詞狀添砌妄控復串唆教供實屬生事擾害著照所擬發極邊足四千里充軍已革鄖西縣知縣謝翼清於人命重案報驗擲稟不收復於會驗後捏改傷痕並呈遞親供曉曉置辯輒以毫無根據之詞任意狡賴玩視人命袒護書吏釀成蒸檢之案情節尤重著發往軍臺効力贖罪已革鄖西縣知縣彭世翰於原驗拳踢各傷尙無錯誤惟任聽仵作喝報填註有毒會審時又復幫同拷訊非尋常疎忽可比業經革職著毋庸議鄖陽府知府承祿竹溪縣知縣周益承審此案並不虛衷研鞫用刑拷訊致王士俊誣認重罪雖未

定案究屬草率候補知縣柳玉麟邵承灝於屍子稟請免檢雖無抑勒情事惟輒令改具確係病死切結殊屬不合武昌府知府王庭楨寫給屍子據實呈情四字令其照繕代詳亦有不合承祿周益柳玉麟邵承灝王庭楨均著交部議處按察司黃彭年道員嚴昉覆審犯供翻異未能嚴切根究及檢有應傷復專執成案屢加詳駁殊屬拘牽黃彭年嚴昉均著交部議處署湖廣總督卞寶第於王庭楨稟詳免檢並不批駁及檢出應傷又不詳究供情輒行奏提件作覆檢辦理究屬未當湖北巡撫彭祖賢於免檢詳文未經批駁亦有不合卞寶第彭祖賢著交部分別議處○諭倪文蔚奏順德縣屬被風查勘撫卹一摺廣東順德縣屬本年四月初間陡起颶風兼以暴雨傷斃居民九十餘名口房宇倒塌多間並有覆溺船隻情事覽奏殊深憫惻卽著該督撫督飭地方官確切查明妥籌撫卹毋任失所○乙亥諭太常寺卿徐樹銘奏續勘子牙減河分途入海情形繪圖呈覽一摺著李鴻章畢道遠周家楣歸入徐樹銘前奏一併確實估核次第辦理圖併發○諭太常寺卿徐樹銘奏直隸清河道史克寬所挑子牙古洋新河水勢不順子牙河南岸低窪因頂托浪激民房傾陷甚多本年該道復於北岸加高而南岸並未培修致南岸各村雨後復被水災請將該道嚴議等語據奏情形實屬辦理乖方玩視民瘼史克寬著交部嚴加議處至上年扒堤釀命一案礮船員弁不卽勸阻反助村民開礮轟斃多命殊堪痛恨著李鴻章查取職名交部議處

以示懲儆○諭前因太常寺卿徐樹銘奏直隸獻縣城西陳家莊等村自新開橫河及堵塞古洋河後河流倒灌淹漬成災請飭妥籌保衛當令該京卿馳往該縣查勘奏辦茲據奏稱馳抵該處詳加相度擬將古洋河堵塞之處恢復深通由東北引入子牙河下游仍別濬支河以洩子牙河巨漲所有築堤建閘開河購料等事酌擬辦法請飭趕緊等語所奏查勘獻縣河務情形尙屬詳盡卽著李鴻章畢道遠周家楣按照徐樹銘所擬各節核實估計趕緊籌撥欵項妥爲辦理總期有利無害保衛閭閻用副軫念民生至意○諭潘蔚奏已故督臣沈葆楨之妻林氏乞援守城保全閭郡請附祀沈葆楨專祠並鈔錄該氏書稿呈覽一摺據稱咸豐六年賊匪竄擾江西時沈葆楨爲廣信府知府赴鄉籌餉其妻林氏因郡城危急作書乞援於已故總兵饒廷選沈葆楨旋卽回署與饒廷選同守郡城該氏躬親執炊以犒將士用是連戰皆捷郡城得全實屬深明大義沈林氏著准其附祀沈葆楨廣信府城專祠○諭陳士杰奏黃水盛漲各州縣險工迭出設法搶堵一摺據稱前月初九等日黃水陡漲風雨交作民埝大堤節節生險迭飭各州縣搶護東阿等十一州縣均已搶護平穩惟齊東縣蕭家莊閻家莊厯城縣下游霍家溜河套圍利津南岸下游等處民埝被水漫決成口大堤內外均被衝刷照例賠修請旨交部嚴議並請將承修各員暫行革職留任留工督修等語山東黃河新築長堤甫經告竣何以民埝又被衝決雖據稱埝工未竣猝不及

防而一切堡房防勇均未布置周密究屬咎無可辭陳士杰著交部嚴加議處承修印委各員署歷城縣知縣程兆祥候補知縣汪麗金署齊東縣知縣張鴻鈞候補知縣文琦均著暫行革職分別留任留工責令督修仍著陳士杰認真督飭各員設法堵築務期工程穩固永保安瀾被淹各村有無損傷人口並著確實查明妥爲撫恤毋任失所○諭內閣學士陳寶琛奏江西甯都直隸州知州韓懿章執法殃民上控京控案牘疊疊候補知府榮綬招權納賄專善逢迎九江府知府達春布偏執昏庸顛頑恇怯吉安府知府鍾珂辦理案件不能持平結怨釀患請旨嚴查撤參等語澄清吏治首在嚴劾劣員該學士在江西學政任內採訪衆論證以實事所參韓懿章等各款見聞確鑿必應從嚴懲處韓懿章劣跡尤多著卽行革職與榮綬達春布鍾珂三員均交潘霽按照所奏各節分別查參陳寶琛奏參片內聲明韓懿章榮綬二員該撫未令赴任亦未派差是亦知其不堪任使何以不卽奏參現經飭令查辦倘該撫稍有瞻徇迴護定卽一併嚴懲懷之○丙子諭前據張之洞奏歸化城副都統奎英阻撓公事於蒙民交涉事件徧袒徇庇各節當諭令察哈爾都統紹祺就近確查具奏茲據查明覆奏副都統奎英於山西辦理邊務尙無授意阻撓情事至私裁鶯粟令解戶司懲辦清丈糧地迭次行文先造底冊辦理均無錯謬惟於蒙古五十窩盜分贓一案地方官審有確據該衙門兵司尙以現有要差咨提會審該副都統失於覺察咎實難辭

副都統奎英著交部照例議處另片奏土默特蒙兵向賴游牧養贍現經編立客民戶籍報地升科蒙古不免失牧之憂等語卽著綏遠城將軍督率土默特參領按照當年界址無論已開未開挖濠立界繪圖貼說辦理明確並著咨照山西巡撫於升科時不得令客民任意指報以清牧界而安蒙民○諭張佩綸奏鎮將難期得力據實糾參一摺據梅著福建臺灣鎮總兵楊在元前於同治年間在臺灣鎮署任曾因濫委營缺侵冒營餉革職勒追嗣以銀兩照數賠繳奏結此次重至臺南軍民無不忿讐並查參將楊在田七年兩次丁憂該員係其胞弟並未聲明丁憂等語臺灣地方緊要似此貪謬不肖之員豈能得力楊在元著卽行革職勒令回籍臺灣鎮總兵著何璟遴委妥員署理○諭前據李鴻章奏繼格紹祺先後奏稱熱河建昌縣及多倫廳附近地方匪徒聚眾滋事迭經諭令督軍會剿嗣據該署督等奏報屢次剿匪獲勝茲據繼格奏擊散全股逆匪生擒首要各犯一摺此股匪徒由白岔竄入赤峰縣屬並分竄養漢壩底舊巢官軍整隊迎擊膽敢列陣抗拒施放鎗礮官軍分路夾攻匪勢不支紛紛逃竄殄斃多名生擒逆首楊長青等訊明正法惟匪目王瑞仁率黨二百餘人逃入圍內及匪目周沅得等未獲仍著嚴飭各員弁跟蹤追捕迅將在逃餘匪悉數殄除毋留餘孽以靖地方該署督等前奏此股匪徒係宋敬思楊步瀾爲首次訊據匪供並無其人是是否屬實著確切查明認真緝毋任漏網○諭御史唐椿森奏河務緊

要請飭各督撫認真辦理等語河工關係地方利害宜如何實事求是妥慎修防若如所奏領欵則層層剋扣承修官之幕友家丁又多染指委員防汛多未到工長官毫不加察各節種種玩視要工尙復成何事體著該督撫等嚴飭所屬各員於河工修守事宜務須工堅料實不准稍有剋扣侵漁委員等均應常川駐工實力防範不得擅離汛所尙有前項情弊卽著從嚴參辦○丁丑廣東水師提督吳長慶卒賜卹如例○以曹克忠爲廣東水師提督○戊寅諭侍郎許應騷奏遵保人才一摺前任江西南康府知府曹秉溶著俟服闋後交吏部帶領引見江蘇候補道葉廷眷著該督撫給咨送部引見廣東候補副將黃金福著交張之洞差遣委用記名提督賴長春著發往福建船政局交何如璋差遣委用○己卯諭御史鄭嵩齡奏山東水災賑撫事宜請飭實心妥辦等語據稱向來外間辦賑州縣奉行故事假手書吏藉端歛錢私行威嚇種種弊端不堪枚舉此次山東齊東等縣民捻決口被淹各村業經諭令該撫查明撫恤著陳士杰確切查勘如有應行撫恤之處該撫務當督飭官紳實心經理不准假手吏胥致滋弊竇用副軫恤民艱至意○鄭嵩齡奏臣恭讀詔旨命中外臣工保薦人才仰見朝廷政在得人勤求吏治之至意臣維方今時事多艱災祲未已固在封疆大吏得人而理而其所最要者莫如州縣誠以州縣爲親民之官無論錢穀刑名是其專職卽興文教講武備弭盜賊救凶荒靡不自州縣始小民之身家繫之地方

之安危亦繫之是州縣之職雖微州縣之權則甚重卽如上年江蘇三牌樓一案河南王樹汶一案本年湖北余瓊芳一案如果州縣廉明虛心研鞫不難澈底根究何至釀成巨案以至於此再近年以來浙江則有客民滋事廣西則有峒匪滋事廣東則有會匪滋事當其事機初露州縣斷不能諉爲不知果能實力實心善爲開導亦可消患於未萌至釀成事端未始非州縣之咎他如飢法殃民苛徵肥己胥役朦混則聽從之家丁攬權則信任之種種弊端尤爲州縣之積習無省無之亦無時無之雖經迭奉諭旨命各省督撫嚴行甄別各省督撫亦隨時參劾而貪刻之員仍不能免蓋因兵燹以來仕路愈寬流品愈雜一時尙難澄清近聞各省亦有考吏之法惟大率以文字試之不知爲吏之要在政事不在文章以此課吏恐終無補應請旨飭下各省督撫於所屬州縣課以實政有缺者自當隨時查察以政令之得失人品之邪正辦事之勤惰秉公舉劾力除瞻徇遷就之習卽無缺者亦當責令藩司排日接見詢以治民之策如有才識優長者分別存記俾派差委缺時自有把握不可視爲具文果能各州縣人人盡心民事則政教自見日興閭閻得以安固實於地方大有裨益上諭御史鄭嵩齡奏請嚴課州縣以清吏治一摺州縣爲親民之官宜如何盡心民事潔己奉公乃近來各省命盜案件地方官並不虛心研鞫以致迭釀巨案各項匪徒滋事又不能消患未萌甚至飢法殃民苛徵肥己積習相沿實堪痛恨亟宜認真考察以

清吏治而重民生著各直省督撫於所屬州縣隨時課以實事分別勤惰貪廉秉公舉劾其候補人員並著督撫藩司勤加考課量材任使不得瞻徇遷就以期力挽頹風日臻上理○庚辰命善慶熙敬管理神機營事務○辛巳 上詣 奉先殿 壽皇殿行禮○諭軍機大臣等聞圍場竄賊裹脅日多恐致滋蔓著李鴻章迅卽飭屬偵探確切情形如該處兵力不敷勦辦卽由防所抽撥數營前往將此股匪徒趕緊撲滅不得稍涉遲延一面卽行奏聞○頒給四川羅江縣龐靖侯廟匾額○諭毓繡等奏永濟庫欠放各項甚多部欸不敷支給請旨飭撥銀兩一摺該庫放欸較前倍增需用孔亟著李鴻章飭令藩司由旗租項下籌撥銀一萬兩卽由毓繡等派員支領以資應用至所請每年不敷銀兩應如何添撥常欸之處著戶部議奏○癸未諭軍機大臣等曾國荃等遽許法國撫卹銀五十萬兩雖係爲和局速成起見然於事無補徒貽笑柄法使尙言須聽國主之命中國大臣反輕自出口允許實屬不知大體陳寶琛向來遇事敢言是以特派會辦乃亦隨聲附和殊負委任均著傳旨申飭現美使願爲調處總署已電知曾國荃等爲期較緩如法使願將津約五條詳細先議曾國荃等卽在滬與議否則曾國荃陳寶琛同回江甯許景澄卽出洋劉麒祥回京美國公平評論數日亦必有信聞省有無警信均著確探酌定行止○諭前因國子監司業潘衍桐奏請特開藝學一科當令大學士六部九卿會同總理各國事務衙門妥議具奏嗣據

御史方汝紹奏請特開實學科並據翰林院侍讀王邦璽奏瀝陳藝學開科流弊御史唐椿森奏曲藝不宜設科先後諭令大學士等一併妥議茲據會議具奏國家造就人材不拘一格設科取士原爲遴選實學起見卽講求藝學亦未嘗不可兼收並取正不必別立科目致涉紛歧嗣後如有精於西法之人在京著各大臣保送同文館考試在外著各該督撫收入機器局當差其無機器局省分分別咨送南北洋大臣核其學術技藝切實保薦庶於因時制宜之中仍不失實事求是之意潘衍桐方汝紹所請特開藝學實學科之處均著毋庸置議○諭內閣學士徐致祥奏遵保人才等語翰林院編修鍾德祥著吏部帶領引見直隸試用道呂耀斗署天津道劉樹棠均著交軍機處存記至已革廣西西隆州知州龔啟藩前因裁減累民土例既未遵飭張貼告示又復藉詞飾稟經慶裕以罔恤民艱等詞奏參革職情節較重徐致祥率行奏保殊屬非是著傳旨申飭○吳壽齡奏吏治之壞壞於現任人員者半壞於候補人員者半捐例開而仕途雜保舉濫而名器輕因之人鮮廉恥奔競成風雖以讀書明理之人亦皆誘於習尚而忘其所學之何事處處有官多之患人人有自顧之憂於是籌及津貼議停分發創立多局定有例差公費名曰調劑議者每謂因時救弊起見而不知徒事虛糜無關實濟夫設官有定制缺則廢公而候補無定章多則滋弊今者長官接見僚屬姓氏尙難盡識政事何從請求終歲無一差委觀察並無由施賢否安能

區別古所謂敷奏明試者蓋兩失之矣京員期滿酌留道府州縣試用甄別久已視爲具文從未聞有奏劾一人者非盡見好也實有無從奏劾者耳然而一經輪補則不得不委令之任有爲者才足濟惡無能者因循誤事而上虧國帑下賤民膏比比皆然至於地方之利弊民生之休戚始終並未嘗念及卽參劾相尋而天下已先受其害豈非心地先不俊偉而又未經歷練之所致哉爲今日謀非亟思變計不可擬請 旨飭下內而各部外而各省無論正途捐納勞績人員悉按缺之多寡資之先後酌留若干員總以可供差遣而其餘俱令暫行回籍比照大挑人員截留之例聽候咨取而其資俸概不扣除俾長官得以隨時接見覘其器識之深淺因事任便驗其才具之短長如有不堪造就者卽行罷斥無稍姑容如此則上無牽制之慮正色率下而使人以不可干下無廢棄之虞洗心從公而持己孰不以正人材以選擇而愈出政治自蒸蒸而日上其視如今之漫無覺察輪班補署瞻徇情面任意差委自蹈包荒之咎徒開倖進之門者果孰得而孰失哉且也內少閒員則廉俸可復舊制而津貼無容矣外少閒員則無人浮於事之患而公費可省矣試思數年來奏銷之案恆多浮冒外銷之款更難核計而乃設立多局歲銷皆不下數千金天下雖大何能任若輩之剝削此有所耗卽彼有所絀始則提自閒款繼則侵及庫儲勢必至於餉項無出而坐以待困夫冗員者固天下無業之游民也民猶乞食於鄉官則乞食於國鑽謀營求弊端